

Matlamat Perjuangan PAS ialah

Negara Islam

“..... pada pendirian PAS: Tiap-tiap hukum yang tidak sesuai dengan Quran dan Sunnah adalah batal dan tidak sah, maka termasuklah perlombagaan negara yang tidak sesuai dengan Quran dan sunnah adalah batal juga pada pandangan dan perdirian Islam”. Demikian kata Dr Burhanudin Yang Dipertuan Agung PAS, dalam mesyuarat agung keenam pada 24 dan 25 Ogos 1957. Ucapannya yang tegas dan jelas itu kami hidangkan seperti berikut:

Jika kita kaji perjuangan kita, lima tahun yang silam, kita telah melancarkan perjuangan tiga segi kita iaitu bangsa, nusa dan agama, dengan memperjuangkan ideologi Islam maka kita tempuh dahulu perjuangan kebangsaan di tanah air kita ini. Saya mula memimpin Persatuan Islam ini pada bulan Disember 1956 yang lalu iaitu baharu 8 bulan.

Perjuangan kita adalah bersifat pelopor dan jujur, menanamkan jiwa pembaharuan dalam Islam untuk isi kebangsaan kita, kebangsaan Melayu di atas bumi pusaka kita Tanah Melayu ini. Untuk mengisi cita-cita dan hasrat kebangsaan Melayu dan nusa Melayu ini kita berlumba-lumba dengan parti-parti dan pertubuhan-pertubuhan yang lain, walau pun secara benda dalam perjuangan cita-cita Islam kita ini, belum dapat kita menunjukkan dengan masa yang sedemikian, tetapi kita percaya di dalam jiwa dan semangat, dan berkembang lebar dengan sambutan yang baik daripada zuriat bangsa Melayu dan umat Islam negeri

ini, dengan kepercayaan kepada ayat “*wallahu ‘āqibat al-umūr*” -(*al-Hajj.4*)

Terhadap Kawan dan Lawan

Setelah menyatakan lawatannya ke seluruh cabang dan ranting PAS di Tanah Melayu, dan setelah menyebut kekurangan-kekurangan yang sayogiyai diatas, Dr Burhanudin menegaskan:

Satu perkara yang patut saya sebutkan di dalam ucapan saya ini ialah sikap kita terhadap parti-parti dan badan-badan politik yang lain di tanah air kita ini, kita telah menunjukkan sikap kita ialah dari rasa kejujuran kita dalam memikul tugas dan kewajipan kita memperjuangkan dasar cita-cita PAS melangkah ke gelanggang politik di Tanah Melayu ini beriring-iringan dan berlumba-lumba dengan parti-parti yang lain, bahawa dasar pokok perjuangan kita ialah kemerdekaan yang penuh.

A) Kebangsaan negeri ini mestilah Melayu

B) Mestilah diakui bahawa bangsa Melayu adalah tuan punya negeri ini.

T) Untuk membina satu bahasa, satu negara
dan satu bangsa yang teguh hanya diakui bahasa
Melayu sahaja jadi bahasa rasmi dan bahasa
Kebangsaan yang tunggal di negeri ini.

TH) Islam menjadi agama rasmi dalam erti
kata yang betul pada ajaran-ajaran al-Quran dan Sunnah Nabawiyah.

J) Menentang dasar Jus Soli diberikan
kepada orang yang bukan bumiputera negeri ini, dan
orang-orang yang bukan Melayu yang hendak menjadi rakyat
negeri ini hendaklah dengan permintaan yang diluluskan
oleh undang-undang, yang mengawal keselamatan wujudnya bangsa
Melayu daripada dicurahkan dengan orang-orang dagang ke negeri
ini oleh Open Door Policy itu.

Mana-mana parti dan pertubuhan yang sama atau serupa
dengan dasar pokok perjuangan PAS tersebut di atas,
dapatlah PAS bekerjasama dengannya dalam sesuatu langkah,
dan mana-mana parti yang berlawanan dengan dasar pokok
PAS itu kita nyatakan teguran dan bangkangan kita,
termasuklah yang kita tegur dan bangkang itu pada
pertubuhan seperti UMNO dan Perikatan kerana keluar
dari dasar perjuangan kita. Apa yang kita rasa perlu
bagi memperjuangkan cita-cita kita yang tersebut itu telah
kita sampaikan kepada pengetahuan rakyat negeri ini.
Adat perlumbaan dan perjuangan di gelanggang perlumbaan
itu memang ada dahulu kemudian, mundur dan maju,
dan terserlah kepada rakyat memilih dan menyokong yang benar.

Sikap PAS Terhadap Komunis

Adapun sikap kita terhadap Komunis,
kita telah menerangkan berkali-kali pendirian kita Islam
dan pendirian PAS dalam menghadapi Komunis tetapi
masih ada kedengaran dan kelihatan dalam tulisan-tulisan
membabitkan saya dan persatuan Islam ini berbau
Komunis, dan yang anehnya pula ada yang membabitkan



Dr Burhanuddin

saya dan persatuan Islam ini berbau penjajah, dua
tuduhan yang timbul dari nafsu buta, palsu dan jahil.

Sesungguhnya saya, dan bagi pihak persatuan
Islam tidaklah berbau Komunis dan penjajah, saya
dan PAS adalah berisi – bersifat: Berbau kebangsaan
Melayu dengan cita-cita Islam.

Saya dan persatuan Islam adalah cukup
mengetahui dan sedar berpegang teguh kepada kebangsaan
Melayu, dengan faham kebangsaan dan pendirian yang luas
sebagaimana yang diperjuangkan oleh hasrat cita-cita kebangsaan
Melayu yang telah banyak kali saya terangkan di dalam beberapa
ucapan, makalah dan buku-buku karangan saya, dan
mensesuaikan kebangsaan Melayu itu dengan kehendak rakyat
ummatan wasaṭā, pada masa dunia menempuh perbalahan
-pertelingkahan dan peperangan sebagaimana yang telah berjalan
amalannya dan contohnya dari semenjak Rasulullah, dan
demikian jualah pada ayat “*khayr ummah ukhrijat linnas*”
pada masa dunia dalam perdamaian.

Persatuan Islam adalah cukup sedar dan

mengetahui kepada proses timbulnya blok Barat dan blok Komunis. Dunia hari ini telah menjadi dua blok dan tiap-tiap blok itu cuba hendak menarik dan menyeret negara-negara dan parti ke pihak mereka, dan kita dari Persatuan Islam adalah tetap berdiri pada ajaran imam kita (*al-Qur’ān*) “*walan tardā ‘anka al-yahud walā al-naṣārā hattā tattabi‘ millatahum*”. Tidaklah senang hati Yahudi dan Nasrani itu kepada kamu, sehingga kamu ikut tunduk kepada *millah* (pegangan hidup) mereka itu.

Lagi *al-Qur’ān* mengingatkan: “*laysa al-birra an tuwallū wujuhakum qabla al-mashriqi wa al-maghrib*”, bukanlah setia kamu kepada Islam itu dengan kamu mengadap atau berpihak kepada blok timur atau blok barat. “*Lā ikraha al-dīn qad tabayyana al-rushd min al-ghay*”. Tidak ada paksa dalam agama, sesunguhnya telah terang dan nyatah mana petunjuk dan mana yang sesat.

Berdasar pada ayat ini terang sekali Islam menentang kekasaran dan paksaan, saya dan Persatuan Islam adalah berulang-ulang menerangkan, bahawa kita dalam berlumba-lumba dan berjuang kerana kebebasan dan kemerdekaan dengan dasar demokrasi itu adalah tiada bersetuju, dan menentang sebarang corak paksaan walau dari siapa jua pun.

Perlembagaan Negeri

Manakala syor Perlembagaan Reid disiarkan ternyata bahawa Reid telah menggungting di lipatan. Perjuangan kebangsaan Melayu menuju satu bahasa, satu negara, dan satu bangsa itu dipesongkan kepada Malayan. Kita telah membuat memorandum berkenaan perlembagaan yang kita kehendaki, kita telah membuat bantahan dan teguran, kita telah mengadakan Persidangan Agung tergempar lalu menyertai dan menyokong “Kongres Kebangsaan Melayu yang kedua”.

Isi teguran dan bantahan kita itu adalah merupakan kesal kita terhadap syor Perlembagaan Reid itu menghampaskan dari dasar perjuangan Persatuan Islam dan kebangsaan Melayu yang boleh dibandingkan walau pun sesudah dipinda-pinda perlembagaan itu, bagaimana yang telah dibentangkan dalam Kertas Putih Perlembagaan bagi dijadikan Perlembagaan Malaya Merdeka. Maka kita rasakan kemerdekaan 31 Ogos ini adalah ibarat kata Melayu: “ Menang sorak kampung tergadai.”

Saya rasa tak perlu saya ulang-ulangkan lagi kesesalan kita terhadap perlenagaan itu kerana telah tersiar dan disampaikan kepada cawangan-cawangan kita. Haruslah diingat corak dan nilai Perlembagaan Kertas Putih sedemikian rupa telah diterima ibarat nasi telah menjadi bubur. Kebangsaan negeri ini tidak disebut Federation of Malaya nama legal yang terpakai yang sepatutnya bernama Persekutuan Tanah Melayu yang menjadi nama legalnya sekarang, isinya ialah Persekutuan Malaya.

Bilakah rakyat akaan menyedari perjuangan kebangsaan Melayu yang telah dijerumuskan dengan rupa perlembagaan ini? Maka ini harus dan mestilah jangan kita tinggal kesal, tetapi berjuang terus mengisi merdeka 31 Ogos dengan jihad dan perjuangan yang bersungguh-sungguh mengembalikan taraf dan kedudukan bangsa Melayu di atas nusa pusaka ini.

Sebagai menyaksikan kapada rakyat adakah benar pendirian dan pendapat PAS terhadap Perlembagaan Reid itu telah dibawa ke dalam Kongres Kebangsaan Melayu yang kedua, bahawa PAS adalah sama dengan hasrat dan cita-cita bangsa Melayu, dan PAS adalah terus tetap memperjuangkan kebangsaan Melayu bersama warga Kongres Kebangsaan Melayu kedua itu, dan segala keputusan Kongres tersebut telah pun

tersiar kepada umum bangsa Melayu rakyat negeri ini.

Corak dan Bentuk Kemerdekaan

Adapun kemerdekaan 31 Ogos 1957 ini telah mencapai kerajaan sendiri atau merdeka dalam Common wealth berdasarkan di atas perlembagaan yang disyorkan oleh Lord Reid kemudian dipinda-pinda yang telah dipersetujukan oleh Raja-raja Melayu dan diterima, dan disahkan dalam Majlis Mesyuarat Undangan pada 10-11 Julai kemudian dalam Parlimen British.

Berdasarkan kepada Kertas Putih Perlumbagaan itu ialah suatu cara perubahan Perlumbagaan Federation of Malaya. Dahulunya kuasa pentadbiran British itu ditadbirkan oleh British sendiri, dan sesudah 31 Ogos ini diserahkan kepada raja-raja dan wakil rakyat menurut istilah British, dengan ekonomi dan modal-modal British dan modal asing tetap terjamin dalam negeri ini. Adapun hal pertahanan belumlah dapat kita lihat perjanjiannya, tetapi tentera-tentera luar negeri Commonwealth ataupun Pakatan Siyato boleh duduk di Malaya, manakala hak mutlak hak ketuanan bangsa Melayu dileburkan dengan istilah rupa kerakyatan baru dengan memasukkan orang yang bukan Melayu menjadi rakyat negeri ini dengan dasar Jus Soli berjalan sesudah merdeka. Kedudukan istimewa ada disebutkan, bahasa Melayu bahasa kebangsaan dan rasmi disamping bahasa-bahasa asing, Islam dituliskan sebagai agama rasmi.

Bila dipandang ke dalam merdeka 31 Ogos ini ialah perpindahan tadbir politik dalam negeri dengan tidak diganjak kedudukan ekonomi Kapital penjajahan dan dasar-dasar pelajaran yang berbau penjajahan yang menekan kelincinan perkembangan bahasa Melayu dengan pelajaran bahasa asing sehingga terhapuslah sekolah Melayu berganti dengan “Sekolah Umum”.

Dipandang pada hasrat dan cita-cita perjuangan Melayu sekian lama menentang penjajahan dan *Open Door* polisinya maka apa yang didapat dalam perlumbagaan itu ialah ibarat lembu sakit sapi dapat nama, sorak-sorak merdeka kampung tergadai yang mesti berkehendakkan tebusan yang hebat dan berat dari bangsa Melayu.

Merdeka Menurut Cita-cita PAS

Dalam memperjuangkan cita-cita Islam itu memandang kepada kenyataan keadaan maka kemerdekaan penuh bangsa dan nusa itulah tingaktan yang dilalui oleh PAS kerana kemerdekaan bangsa dan nusa yang sepenuhnya belumlah lagi bererti tercapainya cita-cita PAS dan belumlah dihitungkan telah merdeka dengan sepenuhnya, melainkan setelah berjalan hukum-hukum Islam pada orang seorang, masyarakat dan negara, barulah tercapai kemerdekaan yang dicita-cita oleh PAS.

Kemerdekaan bangsa dan nusa boleh bebas membuat undang-undang dan peraturan-peraturan tetapi tidaklah disyaratkan undang-undang dan peraturan-peraturan itu sesuai atau tidaknya dengan Quran dan Sunnah Nabawiyah. Maka pada pendirian PAS tiap-tiap hukum yang tidak sesuai dengan Quran dan Sunnah adalah batal dan tidak sah, maka termasuklah perlumbagaan negara yang tidak sesuai dengan Quran dan Sunnah adalah batal juga pada pandangan Islam.

Ahli-ahli hukum Islam berpendapat dan berpendirian: “*al-Qawāniḥ al-waḍī’ah yabṭaluha al-Islām*” (undang-undang rekaan manusia dibatalkan dengan Islam). Firman Allah dalam surah *al-Qaṣāṣ* ayat 50: “*fain lam yastajībū laka fa’lam innama yattabi’una ’hwaahum waman aqālu mimman ittaba’ahawāhu bighayri hudā mina Allah.*”

Manakala undang-undang yang dibuat itu tidak terpakai pada sisi syariat Islam, maka dengan sendirinya undang-undang rekaan dan ciptaan manusia itu batal dengan

sendirinya pada hukum.

Islam Dalam Kertas Perlembagaan

Dalam kertas Putih Perlembagaan telah disebut Islam telah diakui sebagai agama rasmi negeri ini, pengakuan ini tidak terpakai pada sisi hukum Islam kalau sekadar hanya dituliskan sahaja Islam sebagai agama rasmi, tetapi barulah boleh dipakai pengakuan agama Islam itu jadi agama rasmi ialah apakala aturan-aturan dan hukum-hukum serta undang-undang asasi yang didirikan oleh kerajaan itu dibina di atas undang-undang Islam dan dari Islamlah keluar undang-undang itu dan daripada Islamlah diambil suatu hukum dan pengambilan hukum jua dikembalikan kepada Islam, hakim yang menyuruh dengan hukum Islam dan melarang pun dengan hukum Islam.

Maka bagaimanakah sahnya Islam jadi agama rasmi, padahal pada tulisan sahaja, sedang undang-undang (yang dijalankan ialah – P.) rekaan manusia, pengambilan hukum dari undang-undang rekaan itu, mengembalikan hukum kepada undang-undang itu, dan keputusan pun diletakkan atas undang-undang itu. (Lihat undang-undang PAS fasal 4 ceraian(1) alif, berbunyi:

Adapun hukum yang tertinggi sekali dalam pegangangan PAS ialah kitab Allah dan Sunnah Rasul serta Ijmak Ulama yang terang dan nyata, dengan tertakluk kepada hukum yang tertinggi itu adalah kekuasaan PAS dipegang oleh Majlis Mesyuarat Agung.

Perlembagaan Islam

Maka memandang kepada pendirian dan cita-cita perjuangan PAS masih jauh benar kita daripada merdeka. Perjuangan dan jihad PAS mesti menempuh lebih dahulu sepenuh-penuh kemerdekaan nasional dan terdiri keadilan sosial

dalam negara kita barulah kita sampai kepada gerbang memperjuangkan sepenuh cita-cita dan hukum Islam itu kecuali jika dapat terus didirikan perlembagaan Islam, kerana selagi umat Islam ini belum berperlembagaan dan menghukum bagaimana yang diaturkan Allah, adalah mereka masih dipandang fasik atau zalim.

Manakala kita nilai merdeka 31 Ogos ini dari segi perjuangan kebangsaan Melayu maka kita dapati dalam perlembagaan itu kosong daripada kebangsaan Melayu malah berkisar pada bentuk Malayan. Dari segi nusa, Singapura terpisah daripada Tanah Melayu. Nama tanah air kita pada legal ialah **Federation of Malaya** terjemah harfinya ialah **Persekutuan Malaya** bukan **Persekutuan Tanah Melayu**. Kecuali jika rasmi pada legal dinamakan **Pesekutuan Tanah Melayu** dalam bahasa Melayu dan bahasa Inggeris. Pemakaian perkataan Federation of Malaya itu pun perjuangan kita terkena helah.

Merdeka dari segi Agama Islam adalah sebagai dikatakan tadi cuma pada tulisan “ Islam agama rasmi” sahaja, pada isinya kosong.

Dengan perbandingan itu dapatlah kita mengukur setakat mana baru berjalan perjuangan PAS setakat sampai Merdeka 31 Ogos ini.

Gelanggang Perjuangan

Bagaimanapun dengan merdeka ini peluang telah terbuka, gelanggang perlumbaan telah terbentang, kita adalah berdiri di hadapan gelanggang perjuangan yang luas dan jauh lagi. Kita perlu merebut lapangan nasional. Lapangan keadilan masyarakat, kita mesti bekerja dan berjuang keras mengajar perubahan itu supaya jangan terlepas.

Kebangsaan Yang Bulat

Dalam Malaya yang masih terjajah dalam masa peralihan ini telah ketara golongan-golongan Nasionalis yang

berbagi-bagai corak. Di antara yang terbesar ialah Nasionalis yang bulat iaitu kebangsaan Melayu bagaimana yang lalu saya terangkan dari dahulu hingga sekarang ini, kedua Nasionalis pro kanan, ketika Nasionalis pro kiri, keempat Nasionalis Kanan, kelima Nasionalis Kiri. Kanan yang menyebelah penjajahan dan kiri menyebelah Sosialisme atau Komunisme.

Nasionalis bulat itu sifatnya dari dahulu lagi berjiwa progresif. Itulah yang sesuai dengan dasar perjuangan PAS yang ditunjukkan oleh ayat “*umatan wasaṭā*” dan “*khayra ummah ukhrijat linnās*” bagaimana yang dirakamkan dalam anggaran dasar Persatuan Islam.

Cita-cita Islam dan Penjajahan

Dengan datangnya merdeka 31 Ogos ini bererti penjajahan cara lama telah mula keluar tetapi penjajahan moden belum menunjukkan belangnya. Maka apa jua corak penjajahan tetap tidak dapat diterima oleh cita-cita Islam dan perjuangan PAS. PAS mahu bebas dan merdeka sepenuhnya bangsa, nusa dan agama dari sebarang apa jua penindasan dan penjajahan.

Persatuan Islam dan perjuangan umat Islam sedunia adalah sama menyedari dan mengisafi tiap-tiap perkembangan politik nasional dan internasional serta perlawanannya blok-blok dunia, bahawa umat Islam adalah tetap dengan dasar dan tujuannya beimamkan *al-Qur’ān* dan Sunnah Nabawiyah, bahawa dunia seluruhnya dan segala isinya adalah kepunyaan Allah.

Susunan perjuangan Persatuan Islam ialah dimulai: *yad ‘ūna ilā al-khayr waya ’murūna bi al-ma ’rūf wayanhawna ‘ani al-mūnkar*:

1. Dengan menyeru.
2. Menyuruh berbuat ma’ruf.
3. Melarang berbuat munkar.

Itu adalah tugas hak dan keadilan bagi

keselamatan bani insan yang sentiasa berpendirian Islam dan persatuan pada mempertahankan hak (defensif) dalam mengadap semua faham dan isme, Tidak boleh menceroboh atau melampau (agresif). Kita umat Islam wajib mengulang dan membaharu pendirian kita dengan azam baru yang besih 17 kali sehari: *Ihdinā al-ṣirāt al-mustaqīm ṣirāt al-ladhina ’an ‘amtū ‘alayhīm ghayr al-maghḍūbi ‘alayhīm walā al- qālīn*.

Kerana itu dalam pancaroba berbagai-bagai faham dan isme-isme yang telah ada sebelum Tanah Melayu merdeka dan akan terus adalah jua setelah Tanah Melayu mereka 31 Ogos ini maka masanya sudah tiba, waktunya sudah sampai bahawa umat Islam mesti menetukan pendiriannya dan perjuangan sendiri dengan mengambil tempat yang betul dan tegas tidak boleh berdolak-dalik lagi.

Pada tingkat mula Nasionalisme corak mana yang mesti kita berdiri dan terus perjuangkan. Dan Sosialisme corak manakah yang tidak berlawan dengan dasar perjuangan kita dan jihad Islamiyyah kita.

Segenap bangsa Melayu sesudah merdeka 31 Ogos ini adalah dalam dugaan dengan pancaroba faham-faham dan isme yang telah diterangkan itu seolah-olahnya terbentanglah tiga jalan besar di hadapan rakyat negeri ini:

- 1) *al-ṣirāt al-mustaqīm*, jalan di sebelah tengah.
- 2) Jalan kanan ialah garisan penjajahan lama bersambung dengan penjajahan baru.
- 3) Jalan kiri yang menuju Sosialisme dalam perlumbagaan Persekutuan Tanah Melayu merdeka, terbukalah laung dacing atau jalan mana yang ramai diikuti dan diperjuangkan oleh rakyat negeri ini dengan tidak kira betul atau tidak betul, redha atau tidak direbah Allah. Mana jalan perjuangan yang ramai dan banyak penyokong dialah yang menang dalam perjuangan demokrasi

corak barat ini dan yang menang itulah yang mencorakkan dan mencelup warna yang dikehendaki oleh cita-cita parti yang menang.

Bangsa Melayu Hendaklah Sedar

Kita seluruh bangsa Melayu hendaklah sedar dan kenal pada harga dan nilai dirinya, kekuatan Melayu ada pada persatuannya, kembali bersatu sesudah perahu lalu kiambang bertaut, dan kita umat Islam terutamanya dari Persatuan Islam ini hendaklah ingat dan sedar benar-benar. Kita jangan mahu tersalah celup dan tersalah warna selain dari warna dan celupan yang diredhai Allah bagaimana tersebut di dalam ayat: “*waman 'ahsana min Allah sibghah*”, ertinya: siapakah yang lain daripada Allah yang lebih baik celupannya?

Janganlah kita dalam perjuangan ini terpedaya dengan berbagai-bagai warna-warni dan celupan-celupan lin, berpandulah kepada ayat: “*Mā kunta tadrī mā al-kitāb walā al-imān walakinna ja'lānāhu nūrān nahdī bihi man nasha' min bādinā wainnaka litahdī ilā shirāt mustaqīm*”, ertinya: tidaklah engkau dapat mengerti apakah *al-Qur'an* itu dan tidak juga engkau tahu dapat merasakan lazat iman itu tetapi kami jadikan *al-Qur'an* itu cahaya yang kami berikan pertunjuk dengannya kepada siapa yang kami kehendaki daripada hamba-hamba kami, dan engkau hai Muhammad sesungguhnya hanya menunjukkan hamba-hamba kami kepada jalan *shirāt al-mustaqīm* itu.

Tidak ada jalan lain yang selamat dan dalam jaminan Tuhan dalam menempuh ombak gelombang dan badai taufan perubahan dan pancaroba berbagai faham dan isme ini sama ada ke dalam mengadap soal nasional atau keluar mengadap internasional hari ini melainkan balik berdiri betul di atas *shirāt al-mustaqīm*, kerana di sana boleh bertemu dan didapati segala titik kepentingan yang diperjuangkan oleh segenap faham dan ideologi yang

dianut manusia dalam dunia ini, kerana di sanalah terjumpa simpul titik persamaan dengan cita-cita tabii yang diperjuangkan oleh umat Islam itu.

Kerana hak dan keadilan cita-cita Islam ini Persatuan Islam ini dengan penuh kepercayaan dan bersungguh-sungguh memperjuangkan hak dan hakikat Islamiyah. Bahawa potensi kekuatan tenaga dan kemampuan umat Islam adalah mengandungi iman dan kemahuan cita-cita dan hidup yang dinamis dan di sinilah terletak perintah Allah: “*Inna Allah ya'mur bi al-'dli wa al-ihsān*”, sesungguhnya Allah menyuruh kamu dengan melakukan keadilan dan ihsan.

Dalam menjalankan tugas:

1. *yad'ūna ilā al-khayr*
2. *waya'murūna bi al-ma'rūf*
3. *wayanhawna 'ani al-munkar*

Bukan hanya dengan cara surau-surau dan masjid-masjid sahaja tetapi hendaklah melompat ke tengah-tengah medan berkumandang di tengah-tengah masyarakat manusia.

Bersungguh-sungguh menyusun barisan pertahanan:

Dar'u al-mafāsid muqaddam 'alā jalbū al-masālih, ertinya: menolak dan membuang apa yang boleh membawa kerosakan hendaklah didahulukan daripada mendirikan pembangunan.

Tanggungan Persatuan Islam adalah lebih berat daripada segala parti-parti yang lain. Kewajipan dan tugas ini bukanlah di atas pikulan persatuan Islam sahaja bahkan di atas seluruh umat Mukminin dan Muslimin negeri ini, hendaklah sama-sama faham mengambil pendirian untuk kepentingan Islam dan Muslimin dengan berusaha berjuang dengan penuh kesungguhan dan keyakinan.

Walyansurna Allah man yansurhu inna Allah liqawiyun 'azīz.

“Sesungguhnya Allah pasti akan menolong siapa yang menolong agama-Nya, bahawa Allah maha gagah dan perkasa”

Allahu akbar! Merdeka!